

Saturday, April 12, 2025

Time - 2:30pm - 2:35pm

REGIONAL NEWS BULLETIN

(MIDDAY)

CM

Chief Minister Pu Lalduhoma'n Sawrkar laipui hnuaia hmalakna hrang hrang hnuaia hamthatna awm te Mizoram Sawrkarin a tam thei ang ber hnuhchuah a duh thu a sawi.

He thu hi nimina a pisa-a National Scheduled Tribes Finance & Development Corporation Chairman cum Managing Director Pu T. Roumuan Paite leh Ministry of Tribal Affairs Jt. Secretary a kawmna ah sawiin Chief Minister chuan Mizorama hmalakna zau zawk nei tura an lo zin chu lawmawm atih thu a sawi a, Mizoram sawrkarin Development Corporation hnuaia hmalakna hrang hrangah hamthatna awm thei te a tam thei ang ber Mizoram tana chawk luh ve an duh tih a sawi.

Pu T. Roumuan Paite hian, an Corporation leh Ministry of Tribal Affairs kal tlanga Mizoramin hma a lak theihna hrang hrangah theih tawp chhuahin Mizoram tan hna an thawh tur thu Chief Minister hi a hrilh a. An hmalak dan tlangpui a hrilh bawk.

Chief Minister hi Tourism Minister Pu Lalnghinglova Hmar leh Tourism Director leh OSD to CM Pi R. Lalrodingi ten an tawiawm a ni.



MUHCS

Mizoram Universal Healthcare Scheme (MUHCS) ah MLA tin ten an hlawh atangin thla tin cheng 1500 an chhung lut tawh dawn.

Nimina General Purposes Committee (GPC), Mizoram Legislative Assembly thukhawm chuan lungrual takin Sawrkar policy, Mizoram Universal Health Care Scheme (MUHCS) ah an hlawh atangin thawh neih ve tha an tih thu sawiin hemi atan hian thla tin MLA pakhatin cheng 1500/- zel thawh nise tiin thutlukna an siam a, General Purposes Committee-ah hian Political Party tin aiawh MLA te an tel a ni.

Puan tawh angin Mizoram Universal Healthcare Scheme (MUHCS) hnuaiah hian damdawi-in 13-a damlo mi 131-te inenkawlina senso atan cheng nuai 6, sing 7 chuang pek chhuah a ni tawh a, Health Care Society CEO Dr. Biakthansangi'n Akashvani Aizawl a hrilh danin tun thla April ni 1-a MUHCS

hmanga pawisa chawi lawk lo (cashless) a damlo 131 te enkawlna senso chu April ni 8, Thawhlelni atang khan pek chhuah tan a ni a. Mizoram hmun hrang hranga damdawi-in 13 - Mizoram State Cancer Institute (MSCI), Zoram Medical College & Hospital (ZMC&H), Civil Hospital Lunglei, Kolasib District Hospital, Serchhip District Hospital, Khawzawl District Hospital, Hnahthial District Hospital, Khawhai PHC, Rapha Daycare Centre, Zarkawt, Aizawl, Mamit District Hopital, Saitual District hospital, Khawbung PHC leh Chhingchhip PHC-a damlo mi 131 te bill pek chhuah tawh hi a vaiin cheng nuai 6, sing 7 chuang a ni a. Mizoram state cancer institute chu dawng tam ber niin, cheng nuai 2, sing 3, sang 5 leh 508 an dawng tawh a, ZMC-in dawtin, cheng nuai 2 sing 3, sang 5 leh 472 a dawng tawh a, Civil Hospital Lunglei chu dawng tam ber pathumna niin, cheng sing 4, sang 1, 255 a dawng tawh a ni.



ISL FINAL

India rama Football inelna sang leh lian ber Indian Super League (ISL) 2024-25 season final chu zanin dar 7:30 hian Kolkata Khawpui a awm Salt Lake Stadium-ah khelh a ni dawn.

ISL Final hi Mohun Bagan leh Bengaluru FC ten an khel dawn a, Mohun Bagan lamah hian Vaivakawn tlangval Lalengmawia Ralte a awm a, an khingpui tur Bengaluru FC lamah hian Bawngkawn tlangval Lalremtluanga Fanai a awm thung a ni.

ISL-ah hian India rama football club tha 13 te an inel a, league round-ah vawi hnih theuh an inkhelh kual hnuah a sang zual paruk ten playoff an khel a, chumi hnuah final hi khelh leh a ni.

Final hi TV-ah chuan Star Sports 3-ah live a ni ang a, online kaltlanga en tur tan JioHotsar-ah en theih a ni baw k ang.

India rama Football inelna sang ber Indian Super League hi kum 2014 atang khan bultan a ni a, ram chhunga club tha inelna ah hian Mizo infiammi ten a bultan atangin player an thawh hnem hle a, tun thlengin club tinah Mizo player tam tak inngahna niin Champion nomawi anlo chawi tawh thin a, kumina Final khelh turah pawh Mohun Bagan player pawimawh Lalengmawia Ralte emaw Final-a an tumpui tur Bengaluru player Lalremtluanga Fanai te chuan Champion nomawi an chawi leh dawn a ni.



RABIES OUTBREAK

Tun hnaia Manipur Churachandpur-a Ui ‘A’ hrileng chungchangah Hnahthial DC Pi K. Vanlalruati chuan ui vulh tute chu fimkhur lehzuala an ui

enkawl tur te ui ‘A’ hri danna, Rabies vaccine laktir vek turin thuchhuah a
siam a, hemi chungchangah hian Aizawl, Serchhip leh Saitual DC te pawhin
khapna thupek anlo chhuah tawh a ni.

District pathuma DC te thuchhuah tarlan danin tun hnaia Manipur
Churachandpur-a ui ‘A’ hrileng avangin Ui vulhtute chu Ui ‘A’ hri danna pe
ngei turin an chah a, khawlaiah zalen takin ui vah tir lo tur leh khawlaia an
chhuahpui dawn anih chuan kai zel turin an ti a, an zun leh ek hnutchhiah lo
turin leh midang tana harsatna siam lovin an vulh tur ani an ti a, thenawm state
Manipur atangin Ui lakluh khap anih bakah ui khuahkhirh lohin mihring a seh
chuan dan hmangin thla ruk lungin tan emaw cheng sang 5 thleng chawi theih
ani a ti bawk.

Churanchandpur a Ui ‘A’ hrileng avang hian tun hnai ah Ui ‘A’ hri
danna Rabies vaccine la, Vety Hospital Khatla ah leh AH&Vety Polyclinic
Hospital ah an pun phah nasa hle a ni.

